

Aruba Museum Experiences y S.A.C. trahando riba proyecto di Galeria pa Arte di Carnaval

ORANJESTAD (AAN) -- "Aruba Museum Experiences NV" hunto cu "Stichting Arubaanse Carnaval" (S.A.C) a yama un conferencia di prensa ayera mainta, cual a ser dirigi pa sres. Ryan Maduro y Rene Riderstat. Ryan Maduro a duna di conoce cu e meta di e conferencia di prensa aki ta pa duna informacion riba un proyecto innovativo cu ambos instancia a caba di finaliza.

"Aruba Museum Experiences NV" y S.A.C a cera un acuerdo recientemente, y pa tal motibo nan kier a trece dilanti e proyecto aki pa prensa, y consecuentemente pa pueblo en general. Ryan Maduro a splica cu un grupo di inversionista priva a pone un fondo disponible y a acerca su persona como nan representante, den e caso aki como "Aruba Museum Experiences NV".

E fondonan aki ta pa crea un galeria di arte cu ta bay bin



den cercania di e terminal di crucero na Playa. Maduro a comenta cu e espacio pa e galeria ta basta grandi (aunque ainda e no por divulga e ubicacion) y e lo bay ta un sorpresa pa hopi hende.

E galeria di arte aki lo worde lanta den dos fase. Esun prome ta caminda cu lo bay expone e tema "Carnaval di Aruba" tanto contemporaneo como su musica, historia, y tur loke tin di haber cu e carnaval di nos pais.

E proyecto ta caba den su

prope fase, y e plan ta pa haci e apertura oficial entre final di mei y cumintamento di juni, pa asina pueblo di Aruba por conoce un poco mas di e galeria di arte cu "Aruba Museum Experiences N.V" lo trece dilanti.

E motibo cu a acerca S.A.C ta obviamente pasobra e organizacion aki ta experto den carnaval, y nan a yega un acuerdo unda cu S.A.C lo yuda desaroya e proyecto cu nan experticio. Maduro a expresa palabranan di danki pa

señora Tecla Kelly como Rene Riderstat, y e comitiva completo di S.A.C cu abiertamente a scucha y duna apoyo for di inicio, na e proyecto aki.

Despues cu S.A.C a duna luz berde, ambos partido a firma un acuerdo riba dia 7 di januari pa asina por cuminsa encamina dicho proyecto.

Pa yuda e galeria opera. S.A.C su papel lo ta yuda "Aruba Museum Experiences N.V" trece e producto den e galeria. Esaki ta encera potret, musica, historia y tur

loke tin di haber cu carnaval. Tambe nan lo yuda cu material, esta cu premiacion di e aña aki y tambe lo traha conhuntamente genera fondo pa e gruponan di carnaval.

"Ami mes como carnavalista pa hopi aña ta tende critica constante cu nos ta inverti den carnaval como participante pero nunca nos ta haya nada bek.

Nos tampoco no ta haya un mencion, ni nada pa saca e sla financiero cu nos ta hinca den carnaval tur aña", Ryan Maduro a comenta.



Esaki ta un di e cuadranan cu lo ta di exhibishon cuminsando diaranson dia 11 di januari na Carnival House & Art Gallery. Su titulo ta princes di Carnaval. E autor di e cuadro aki ta Jani Croes cu a hanja su inspiracion di Evelyn Croes. Den e cuadro nos por mira un beyesa joven den un movimiento dinamico y toch elegante. Nos ta reconoce e simbolo di nos cultura cu ta aparece riba nos casnan di antanjo. Por sinti tambe den e obra aki cu tin musica, movimiento, beyesa y elegancia. Jani Croes lo ta exponiendo algun obra hunto cu artistanan arubano manera Gustave Nouel, Paul van Driel, Glenda Heyliger y mas otro creador nan di obranan di arte.

EXPOSICION DI ARTE NA CARNAVAL HOUSE & ART GALLERY: "identidad"

E profundidad Caribense lo wordo refleha den E exposicion aki.

E artistanan cu ta tuma parti den e exposicion aki ta Charlie Brouns III, Gustave Nouel, Patricia Michaud, Paul van Driel, Jani Croes, Glenda Heyliger, Gilbert Senchi, Vanessa Paulina y Marcia Stamper. E exposicion aki ta tuma lugar den un edificio netamente Caribense dilanti di BSL laundry den centro di San Nicolaas. E apertura di e exposicion aki lo tuma lugar diaranson awor dia 11 di februari pa 6 or di atardi. E adres exacto di Carnival House & Art Gallery ta Captain Rogerstraat # 23. E tema di e exposicion ta jama "identidad", cu ta trata tur loque ta inspira e alma caribense. Nos por spera un variedad interesante den e exposicion aki. Den temporada di carnaval e Galeria aki lo funciona como centro de SAC na San Nicolaas.



PRINCES DI CARNAVAL

Su sonrisa ta spierta e bista den nos profundo paden. Su elegancia sinigual cu ta inspira nos ser den su totalidad. Su alma jen di luz cu ta hasi nos oruyoso di comparti e isla. Un puro beyesa bendiciona cu e corona pa 50 anja y mas

Autor Jani Croes